

373
LUAG TUA YEXUS

Peb saib tsis taus nws thiab tso nws tseg. Nws raug kev txomnyem, nws nyiaj qees kev mob, tsis muaj leejtwg tig ntsia nws. Peb tso plhuav nws tseg yam nkaus li nws tsis tsimtxiaj tus dabtsi.

Tiamsis nws tiv qee ris peb tej kev txomnyem, thiab peb tej kev mob kev nkeeg. Peb suav hais tias, nws raug kev txomnyem li ntawd twb yog Vajtswv rau txim rau nws.

Nws raug luag ntaus nqaij ntuag ntshav nrog twb yog vim peb tej kev txhaum, nws raug luag nplawm twb yog vim peb tej kev phem. Nws ris kiag peb lub txhoj ua rau peb zoo hlo, nws tej qhov txhab ua rau peb ua tau neeg zoo puvntoob.

Peb txhua leej zoo yam nkaus li tej yaj uas ploj lawm, peb nyias mus nyias ib txogkev raws li nyias lub siab nyiam. Tiamsis tus TSWV muab lub txim uas yeej tsimnyog peb ris rau nws ris. (Yaxayas 53:3-6)

Tomqab ntawd, Philaj muab Yexus rau cov tubrog nplawm.

Cov tubrog muab hmab pos koj los ua kauj thi Yexus taubhau. Lawv muab ib lub tsho tsujtseeb xiavliab kho rau Yexus hnav.

Lawv hais dog hais dig rau Yexus hais tias, cov neeg Yudais tus vajntxwv es, thov kom koj ua vajntxwv mus ib txhis. Lawv txawm xuas tawg ncuav ntaus Yexus ntsejmuag.

Philaj rov tawm los hais rau cov pejxeem hais tias, nej ntsia saib. Kuv yuav koj nws los rau nej kom nej paub hais tias, kuv tsis pom nws ua ib qho txhaum hlo li.

Thaum Yexus tawm los Yexus tseem ntoo rawv lub thi pos, thiab hnav lub tsho tsujtseeb xiavliab. Philaj hais rau cov pejxeem hais tias, nej sim ntsia nws saib, nws nyob ntawm no.

Thaum cov povthawj hlob, thiab cov tub ceevxwm uas zov lub Tuamtsev pom dheev Yexus, lawv qw nrov nrov hais tias, muab nws ntsia rau saum ntoo khaublig, muab nws ntsia rau saum ntoo khaublig. Philaj hais rau lawv hais tias, yog li ntawd nej cia li koj nws mus ntsia rau saum ntoo khaublig los mas. Kuv yeej tsis pom nws ua ib qho txhaum hlo li.

Cov neeg Yudais teb hais tias, peb muaj ib txog kevcai qhia hais tias, tsimnyog muab nws tua povtseg rau qhov nws khav hais tias, nws yog Vajtswv tus tub.

Philaj muab Yexus rau lawv koj mus ntsia rau saum ntoo khaublig. Cov tubrog koj Yexus tawm mus. Lawv muab tus ntoo khaublig rau Yexus kwv. Lawv koj nws mus txog ib qhochaw npe hu ua roob khaujkhaum taubhau. (Lus Hinplus hu ua khaulas khauthas)